



REPUBLIKA E SHQIPËRISË
Komisioneri për Mbrojtjen e të Dhënave Personale
Komisioneri

Nr. 1047/13 Prot.

Tiranë, më 14/10/2013

Lënda: Urdhër për Kontrolluesin “Foto Kumi”, Tiranë.

U R D H E R

Nr 17, datë 14/10/2013

Mbështetur në ligjin nr. 9887, datë 10.03.2008 “Për Mbrojtjen e të Dhënave Personale”, i ndryshuar, Vendimet e Kuvendit të Shqipërisë nr 211, datë 1.09.2008 “Për zgjedhjen e Komisionerit për Mbrojtjen e të Dhënave Personale” dhe nr 225, datë 13.11.2008 “Për miratimin e strukturës organike dhe kategorizimit të pozicioneve të punës të zyrës së Komisionerit për Mbrojtjen e të Dhënave Personale”, pas shqyrtimit të relacionit të Drejtorisë së Hetim-Inspektimit në ngarkim të Kontrolluesit “Foto Kumi”, Tiranë.

KONSTATOVA

Në zbatim të urdhrit nr. 164, datë 04.09.2013 të Komisionerit për Mbrojtjen e të Dhënave Personale, u krye inspektimi administrativ pranë kontrolluesit “Foto Kumi”, Tiranë me objekt:

- Plotësimi i formularit të njoftimit (neni 21).
- Ligshmëria e përpunimit të të dhënave personale dhe të drejtat e subjekteve të të dhënave (nenet 5-9 dhe 12-16)
- Masat lidhur me sigurinë e të dhënave personale (neni 27).

Komisioneri për Mbrojtjen e të Dhënave Personale pasi shqyrtoi procesverbalin e inspektimit administrativ, pretendimet e kontrolluesit, si dhe provat e administruara vëren se:

- Kontrolluesi mban dhe përpunon në kompjuter të dhënat personale të klientëve (fotot), për një afat të pacaktuar. Fotot e gjetura në kompjuter datojnë që prej një ose dy vite më parë. (çka është konstatuar nga kontrolli në kompjuter).

Komisioneri vlerëson se mbajtja e të dhënave personale për një afat të pacaktuar bie në kundërshtim me shkronjën d) të pikës 1 të nenit 5 të ligjit nr. 9887, datë 10.03.2008 “Për Mbrojtjen e të Dhënave Personale”, i ndryshuar, në të cilin theksohet fakti se të dhënat personale nuk duhet të mbahen më tepër sesa është e nevojshme për qëllimin për të cilin ato janë grumbulluar ose përpunuar (Parimi i përgjithshëm i cili vlen në rastet kur nuk janë përcaktuar afate specifike nëpërmjet akteve nënligjore të miratuara nga Komisioneri). Duke qenë se qëllimi i mbledhjes dhe përpunimit lidhet me stampimin e fotografisë dhe më pas dhënie të tyre klientëve, atëherë nga ky moment

përfundon afati i mbajtjes së fotove në kompjuter dhe ato duhet të fshihen. Mundësia e vetme ligjore për të mundësuar mbajtjen më tej të fotove është marrja e pëlqimit të klientëve në formë shkresore.

- Bazuar në deklaratat e përfaqësuesit të kontrolluesit, fotot mbliidhen dhe mbahen në kompjuter me pëlqimin e klientëve por ky pëlqim nuk mund të provohet në formë të shkruar (shkronja a) e pikësi të nenit 6, "Kriteret ligjore për përpunimin", të ligjit). E njëjta gjë vlen edhe për fotot e ekspozuara në ambientet e studios.

Komisioneri vlerëson se, në zbatim të dispozitës së sipërcituar, të dhënat personale mund të përpunohen vetëm nëse subjekti i të dhënave personale ka dhënë pëlqimin. Ky është i vetmi parashikim ligjor që mund të lejojë këtë përpunim.

Dhënia e pëlqimit nga ana e subjektit të të dhënave (klientit) personale është shumë e rëndësishme pasi kjo vërteton dhe provon përpunimin e ligjshëm të të dhënave personale (fotove). Në këtë kuadër kontrolluesit i lind detyrimi që të njoftojë subjektet e të dhënave mbi qëllimin e përpunimit, afatin e mbajtjes së të dhënave dhe për të drejtat e detyrimet që parashikohen nga legjislacioni për mbrojtjen e të dhënave personale.

- Sa i përket respektimit të kushteve mbi sigurinë e të dhënave personale të klientëve konstatohet se aksesit në kompjuter nuk është i kufizuar nëpërmjet emrit të përdoruesit dhe fjalëkalimit përkatës, por mund të aksesohet lirisht nga kushdo. Gjithashtu kontrolluesi nuk ka një rregullore të brendshme për sigurinë e të dhënave personale që përpunon (detyrim i parashikuar në Udhëzimin nr.22, datë 24.09.2012 për "Përcaktimin e rregullave për ruajtjen e sigurisë të të dhënave personale të përpunuara nga kontrolluesit e vegjël").

Në këtë kuadër komisioneri vlerëson se është shumë e rëndësishme që aksesit në kompjuter të kryhet nëpërmjet një emri/fjalëkalimit dhe në të njëjtën kohë të hartoet një rregullore e brendshme mbi sigurinë e të dhënave personale në të cilën të parashikohen të gjitha procedurat mbi mbledhjen, ruajtjen, përpunimin dhe fshirjen e të dhënave personale.

- Bazuar në deklaratimet e përfaqësuesit të kontrolluesit, u konstatua se shërbimet për mirëmbajtjen dhe riparimin e pajisjeve kompjuterike realizohen nga një palë e tretë. Në këtë kuadër u konstatua se kontrolluesi nuk disponon një deklaratë sigurie dhe konfidencialiteti, lidhur me aksesin e mundshëm në të dhënat fotografike (të ruajtura në pajisjet kompjuterike) gjatë shërbimeve "hardware" dhe "software" të realizuara nga pala e tretë.

Sa më sipër:

Në zbatim të neneve 29, 30 dhe 32 të ligjit nr. 9887, datë 10.03.2008 "Për Mbrojtjen e të Dhënave Personale", si dhe nenet 107-109 të K. Pr. Administrative :

URDHEROJ

1. Në zbatim të shkronjës c) të pikës 1 të nenit 5 dhe shkronjës a) të pikës 1 të nenit 6 të ligjit nr. 9887 datë 10.03.2008 "Për Mbrojtjen e të Dhënave Personale", i ndryshuar, të fshihen nga kompjuteri dhe pajisjet e tjera të gjitha fotografitë e klientëve, pasi mbahen për një afat që e tejkalon qëllimin për të cilin ato janë grumbulluar ose përpunuar.
2. Të mbahen vetëm të dhënat personale (fotot) për të cilat është dhënë paraprakisht pëlqimi i shprehur qartë (në formë shkresore) i subjektit të të dhënave (klientit).
3. Të kufizohet aksesimi në kompjuter nëpërmjet vendosjes së një emri/fjalëkalimi.
4. Në zbatim të nenit 27 të Ligjit nr. 9887 datë 10/03/2008, Për Mbrojtjen e të Dhënave Personale dhe të Udhëzimit nr. 22, datë 24.09.2012 për "Përcaktimin e rregullave për ruajtjen e sigurisë të të dhënave personale të përpunuara nga kontrolluesit e vegjël", të merren masa për hartimin e një rregullore të shkruar për mbledhjen përpunimin, ruajtjen, sigurinë dhe kufidencialitetin e të dhënave personale të klientëve. (Rregulloren tip mund ta gjeni në faqen zyrtare www.kmdp.al, si dhe ofrojmë asistencën tonë).
5. Në kuadër të realizimit të shërbimeve Hardware dhe Software të pajisjeve elektronike që përmbajnë foto, nga ana e palës së tretë, të parashkohet edhe një deklaratë konfidencialiteti dhe sigurie në të cilën të përcaktohen detyrime konkrete (për palën e tretë) në rast të cenimit të privatësisë.
6. Këto detyrime të rëndësishme që ju ngarkon ligji, të kryhen brenda një afati kohor prej 30 (tridhjetë) ditësh, nga dita e marrjes dijeni për këtë urdhër;
7. Me plotësimin e këtyre detyrimeve të njoftohet me shkrim pranë Komisionerit për Mbrojtjen e të Dhënave Personale;
8. Në rast mospëmbushje të këtij detyrimi, Komisioneri vepron sipas nenit 30, pika 2 të ligjit nr. 9887 datë 10.03.2008 "Për Mbrojtjen e të Dhënave Personale", sipas të cilit: "Komisioneri në rast shkeljesh serioze të përsëritura ose të qëllimshme të ligjit nga një kontrollues ose përpunues veçanërisht në rastet e përsëritura të rekomandimeve të tij, vepron sipas nenit 39 të këtij ligji dhe e denoncon publikisht ose e raportoi çështjen në Kuvend dhe në Këshillin e Ministrave".

Ky urdhër hyn në fuqi menjëherë.

